

Newspaper	Berita Harian
Date	17/08/2017



# PM puji kejayaan

BH - 17/8/2017 pg.3

→ Pelajar UiTM raih tempat kedua pertandingan di China

**Sepang**

**M**uhammad Shahmeer Mohd Nashrul tidak percaya dan terkejut apabila Perdana Menteri, Datuk Seri Najib Razak mengucapkan tahniah kepadanya kerana berjaya mengharumkan nama Malaysia dalam pertandingan *16th Chinese Bridge Chinese Proficiency Competition for Foreign College Students*, pada 12 Ogos lalu.

Pelajar tahun dua jurusan akauntan di Universiti Teknologi MARA (UiTM) Kampus Puncak Alam itu meraih tempat kedua pada pertandingan kemahiran bahasa Mandarin yang disertai 145 pelajar dari 112 negara bersaing selama sebulan (13 Julai-12 Ogos) di Changsa, wilayah Hunan.

Menerusi laman Twitternya, Najib berkata: "Tahniah Muhammad Shahmeer Mohd Nashrul wakil @transUiTM dpt tmpt ke-2 di Pertandingan HanYuQiao China yang disertai peserta seluruh dunia!", yang kemudian dibalas oleh Muhammad Shahmeer: "This is crazy! THANK YOU PM! #malaysiaboleh".

Muhammad Shahmeer berkata, dia teruja membaca artikel ditulis pihak UiTM mengenai kejayaannya di China, yang memetik tweet ucapan tahniah Perdana Menteri.

Katanya, beliau menjawab tweet Perdana Menteri, mengucapkan terima kasih dan mengambil *screen shot* sebelum memaparkannya di Facebook serta Instagram.

"Di China, kita perlu ada sambungan internet melalui VPN (virtual private network) untuk mengakses laman sosial seperti Facebook atau Twitter. Jadi, saya berusaha mendapatkan VPN dan apabila ada sambungan internet, reaksi saya adalah 'It is crazy. Oh my God and I need to reply Datuk Seri Najib,'" katanya di Lapangan Terbang Antarabangsa Kuala Lumpur (KLIA) selepas tiba dari China pagi semalam.

**Bawa pulang trofi**

Muhammad Shahmeer, 22, menjadi peserta tunggal negara dan membawa pulang trofi kemenangan juara bagi peringkat Asia, Anugerah Populariti Terbaik dan Anugerah Kepetahan Terbaik ketika pertandingan akhir serta biasiswa tajaan penuh Kerajaan China.

Tempat pertama diraih pelajar dari Sudan.

Mengulas pertandingan itu, beliau berkata, ia membabitkan beberapa pusingan iaitu pusingan pertama bagi memberikan ucapan diikuti membuat persembahan berhubung kebudayaan China dan akhirnya menduduki peperiksaan lisan serta bertulis mengenai sejarah dan latar belakang negara itu.

Beliau yang berlepas ke Beijing pada 10 Julai lalu, fasih berbahasa Hokkien dan mula bertutur bahasa Mandarin dari Tahun Satu apabila ibu bapanya menghantarnya ke sekolah jenis kebangsaan Cina.

**BERNAMA**